

समे & 12:25 hrs.

<><><><><><>

National Consumer Day

अज्ज राश्ट्रीय उपभोक्ता दिवस मनाया जा'रदा ऐ। हर बरे 24 दिसंबर गी एह ध्याड़ा उपभोक्ताएं दे हितें दी राक्खी दे सरबंध च मनाया जंदा ऐ। अज्जै दे दिन गै उपभोक्ता संरक्षण अधिनियम 1986 गी राष्ट्रपति हुंदे थमां मंजूरी थोई ही ते इसी लागू कीता गेआ ऐ। इस बरे एहदा विषेसार ऐ डिजिटलीकरण ते वर्चुअल तरीके राहें न्याय प्रदान करना। राश्ट्रीय उपभोक्ता दिवस दे मौके पर उपभोक्ता मामलें दे केंद्री मंत्री प्रहलाद जोशी नमीं दिल्ली च इस सरबंध च केई पैहलकामियें दी शुरूआत करडन जेदे च जागो ग्राहक जागो ऐप, जागृति ऐप ते जागृति डैशबोर्ड शामिल ऐ। इंदा मकसद धोखाधड़ी ते जालसाजी दियें गतिविधियें थमां उपभोक्ताएं दी राक्खी करना ऐ।

<><><><><><>

PM-MKB

प्रधानमंत्री नरेन्द्र मोदी अपने माहवार रेडियो कार्यक्रम "मन की बात" दे राएं औंदी 29 दिसम्बर गी देश-विदेश च रौहने आहले श्रोताएं कन्नै बचार सांझे करडन। हर महीने दे अखीरले ऐतवारें दिनै 11 बजे प्रसारत होने आले इस कार्यक्रम दी एह 117मीं किश्त होग। कार्यक्रम च शामिल कराने लेई लोक अपने बचार टोल फ्री नंबर 1800-11-7800 पर फोन करियै जां फही नरेन्द्र मोदी ऐप पर बी इस महीने दी 27 तरीक तगर भेजी सकदे न। मन की बात दा प्रसारण

आकाशवाणी ते दूरदर्शन दे समूलचे नेटवर्क पर कीता जाहग। एहदे इलावा एह प्रसारण आकाशवाणी खबरें दी वैबसाइट ते न्यूज़ ऑन ए.आई.आर मोबाइल ऐप पर बी उपलब्ध होग। एहदे कन्नो कन्नी आकाशवाणी समाचार, डी.डी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी एहदी लाइव स्ट्रीमिंग उपलब्ध होग। आकाशवाणी परा मन की बात दे प्रसारण दे तुरत मगरा मकामी भाशाएं च एहदा अनुवाद बी प्रसारण कीता जाहग।

<><><><><><>

खेत्रीय समाचार एकांश 7 दिसंबर 2024 गी देश दे 347 जिलें च केंद्री स्वास्थ्य ते परिवार कल्याण मंत्रालय आसेआ शुरू कीते गेदे टी.बी दी रोकथाम सरबन्धी 100 रोजा अभियान उप्पर 30 मँटें दा इक्क विशेष कार्यक्रम प्रसारित करोग। एह विशेष कार्यक्रम बुधवार 25 दिसंबर गी बड़डलै साइडे 9 बजे प्रसारित कीता जाग। इस कार्यक्रम दा उद्देश्य टी.बी दी बमारी दी रोकथाम, इलाज ते एहदे बचाव बारे लोकें च जागरूकता पैदा करना ऐ। इस कार्यक्रम च प्रदेश टी.बी अधिकारी डॉ. ज्योति जाली हुंदे कन्नै विशेष गल्लबात कीती गई। इयै जनेह होर दुए महत्वपूर्ण जानकारीयें सरबन्धी प्रसारण लेई एफ.एम 100 इशारिया 3 मैगाहर्टज, 104 इशारियरा 5 मैगाहर्टज ते मीडियम वेब 303 मीटर यानि 990 किलोहर्टज उप्पर आकाशवाणी समाचार ते कार्यक्रम सुनी सकदे हो ते rnujammu@gmail.com उप्पर स्हाड़े कन्नै अपनी प्रतिक्रिया सांझी करी सकदे हो।

<><><><><><>

Waves

केंद्र सरकार आसेआ मनोरंजन दे सरबंध्यै च वेब्स फोरम दी शुरूआत पर कल जम्मू च पी.आई.बी आसेआ इक बाइक रैली दा आयोजन कीता गेआ। बाइक रैली गी जम्मू यूनिवर्सिटी थमां वाइस चांसलर प्रो. उमेश राय होरें झंडी दस्सियै रवाना कीता। इस रैली दा मकसद वेब्स समिट बारे लोकें च जागरूकता पैदा करना हा जेदे कन्नै मनोरंजन दे खेतर च नमियें काहडें बारै उनेंगी जानकार बनाया जाई सकै। इस रैली च बाइकरें बड़ी उत्सुकता कन्ने हिस्सा लैता ते नवाचार ते सांस्कृतिक आदान-प्रदान दा स्नेहा दिता। इस मौके पर प्रो. उमेश राय होरें आखेआ जे एह रैली मीडिया ते मनोरंजन गी जोड़ने आहली ताकत दे रूपै च बढ़ावा देने लेई बचनबद्धता गी दर्शादी ऐ। इस वेब्स समिट च गल्लबात आहले सत्र ते पैनल डिसकशन दा आयोजन होग जिंदे च वैश्विक स्तर पर माहिरें दी शमूलियत दिक्खने गी लब्बोग।

<><><><><><>

DC-Poonch

पुंछ दे डिप्टी कमिशनर विकास कुंडल होरें कल सेना ते सिविल अधिकारियें कन्ने इक मीटिंग लोआइये पुंछ दे दूर-दरेडे इलाकें च शिड़कें दे निर्माण ते मोबाइल संपर्क गी बढ़ाने गी लेइयै विचार-विमर्श कीता। मीटिंग दौरान इलाके च शिड़क परियोजनाएं दे कम्में गी समें उपपर पूरा करने दी गल्ल पर बी बल दिता गेआ। इस दौरान मोबाइल संपर्क गी बढ़ाने लेई 40 थाहरें दी पंछान कीती गेई जित्थे मोबाइल टावर लाए जांगन।

<><><><><><>

CRPF-Rashtra Kathua Sihvar

25मीं राश्ट्र कथा शिविर यात्रा दा उद्घाटन समारोह कल सी.आर.पी.एफ दे ट्रेनिंग सेंटर जम्मू च लग्गास जेदा सरिस्ता जम्मू सेक्टर दे आई.जी आर गोपाल कृष्ण राव ते डीआईजी मनोज कुमार गुप्ता हुंदे निर्देश ते दिक्ख-रिक्ख च कीता गेआ। इस मौके आई.जी आर गोपाल होर मुख परौहने हे। इस जातरा च शामिल होने लेई सी.आर.पी.एफ जम्मू सेक्ट दी 6, 76, 121 ते 160 बटालियनां 100 बच्चें गी भेजा करदियां न। 25मीं राश्ट्र कथा कैंप दा सरिस्ता गुजरात दे राजकोट च श्री वैदिक मिशन ट्रस्ट आसेआ कीता जा'रदा ऐ।

<><><><><><>

Weather

जम्मू खिते च कल होई दी हल्की बूदा-बांदी ते मुगल शिड़क, बनी-भद्रवाह शिड़क ते किशतवाड़ दे सिंथन पास उप्पर बर्फबारी मगरा शिड़का राबता बंद होई गेदा ऐ। जम्मू च बी तापमान च गिरावट दर्ज कीती जा'रदी ऐ। कल जम्मू च मौसम बदलौखड़ा रेआ ते दपैहरी मगरा किश थाहरें उप्पर हल्की बूदा-बांदी बी होई। तोआई डोडा, किशतवाड़, रामबन, पुंछ, राजौरी, रियासी ते कठुआ दियें उच्चियें थाहरें उप्पर ताजा बर्फबारी होई। पुंछ ते शोपियां बक्खरी दी मुगल शिड़क उप्पर पीर गी गली उप्पर होई दी ताजा बर्फबारी करी यातायात ठप पेआ। उआं जम्मू-श्रीनगर राश्ट्रीय जरनैली शिड़क उप्पर गड़्डियें दी आओजाई जारी रेई। कल खराब मौसम करी माता वैष्णो देवी लेई कटड़ा थमां हेलीकाप्टर सेवा बी पूरे दिन भरै दे बंद रेई।

<><><><><><>